

Ogni
can
mena
la coa,
ogni
mona
dise
la soa

Discursi da ostarìa

Carta
canta,
vilan
dorme

Cuotidiano che vien fuora ogni tanto, che scolta, conta e smentisse tuto

Direzion, redazion, amministrazion, stanparìa, vèndia, luogo de nàssita, avvocato, magazin: TUTO DA PESSATI

El canton de Cavareta

A ogni caso provvede la só stùzia

archivio

On dì ghe jera discussion in ostarìa. Uno diséa che el so can da zerca no 'l zerca. Cavareta el ga proposto el remèdio. “Dàmelo na stimana a mi e te vedarè che 'l zerca”, el ghe ga dito al paron del can, che 'l jera de razza bona. El can. Nò el paron... In pagamento ghe bastava éssare mantegnù a na onbra al dì, in atesa del risultato. Passà la stimana, la curiosità la jera grande. “Alora, zérchelo el mè can?”, ghe fa el paron. “Bevémo l'ultima e po' te porto a védare”, dise Cavareta. El can jera in saràjo. Cavareta va drento, el ciapa in man na pètega e zo bòte al can, che 'l scanpava dapartuto. “Ciò, ma cossa fetò?”. “No te vidi come come che 'l zerca?”. “E cossa zérchelo?”. “On buso par scanpare..!”. Mitico!

Indovina indovinèlo...



E chi xelo e chi no xelo?

via uno soto nantero; la 'ndaséa pi par le longhe se te ghivi copà calchedun... “Avanti nantero”, e se scalava on posto, fasendo on strèpito fato aposta par farlo rabiare. Co te jeri “soto” el sbassava la testa, el sarava i oci e ti, inzenocià li, te tacavi la viola, sempre la stessa musica. E la penitenza? Lota co i amighi, on'avemaria; fato combàtare in casa, on'avemaria; na parolazza, on'avemaria; a noàre sol màsaro, on gloriapatri; se te jeri 'ndà al cinema Verdi, on padrenostro, e on pateravegloria se te ghivi saltà la messa. Pa' i ati impuri ghe jera la rècita de l'ato de dolore davanti a elo. Don Luìji el saéa ben che “mi pento e mi dolgo” la jera na busia e cussi el se manedava a darte l'assoluzione, che senò ghe tocava confessarte da nuovo...

Quante volte, filiòlo?

Don Luigi ne ga confessà tuti

Tomaso

Dó, tre file de banchi, in cesa, e sentà uno tacà l'altro na sgnarà de tusiti. A ghivino inamente de doverghe contare a Don Luìji i peccati ca ghivino fato tuta la settimana. Elo no 'l se metéa in confessionale, ma sentà so na carega, de cao del primo banco, tre file pi vanti. Ogni tanto el alzava la testa par védare quanti che ghe ne jera restà, po' el la sbassava, supiàndo de scondon. Zinque minuti,

El ben ca ghe volemo a le bestie el xe sacrosanto...

Guai a chi che abbandona on can

...ma tante canonà a i barcuni che se ris-cia de rivare in Italia!

El Mestro

Ogni istà vien fata na sacrosanta campagna parché no vegna abandonà tante bestiole so le strade. Tegnù da conto de inverno, ma na peàda e via de istà, che le ne intriga sa ghemo da 'ndare in ferie. Desso ghe xe multe e parfin galera par chi che no se mostra tanto cristian da volerghe ben a na bestiola indifesa, che molà al so destin la morirìa de fame... No sò se la zente la sia la stessa che mola le bestie pa' 'ndare al mare, sti malguàji, ma tanti s'è messo in testa che co la stessa facilità se podarìa tirarghe arquante canonà a tuti i barcuni che riva, de solito a Lampedusa, co zente in zerca de on posto dove stare. Sa volemo fare el tiro a segno co le barche va ben, ma prima assè che desmonta i “turisti” che ghe xe su, tuta zente piena de schei che vole fare le só vacanze so la nostra bela isola... Xe normale, nò, che i turisti pieni de schei se presenta cussi? O no saràli par caso tuti pori desgrazià che scanpa da on mondo che li vole morti, magari de fame, e che no i sa fare altro che scanpare e domandare on fià de carità cristiana! Ma i xe mussulmani, dise uno che ghe vole ben al so can! Ben alora... Fondémoli a canonà, barca e tuto, cossa sirà mai!

PREVISION DEL TENPO

Al momento de 'ndare in stanpa ne risulta che so le Palme no gàbia piovesto. Se pioverà sui ovi i casi xe dù: ga rason el proverbio e i ovi no jera ben cuerti. A ogni modo, se xe vero che na rondinela no fa Primavera, figurémosse on zentenaro: la Primavera no vegnarà pi! Difati anca se el tenpo tånbara, fra caldo e fresco pare ca 'ndemo contro l'istà. Tegnémosse prunti.

NO DESMENTEGARSE CHE...

Co' 'ndè al cinema, dire na jaculatoria par chi che cronpa benzina, parché i la ga aumentà par no créssare el prezzo del billieto. Sa ghi spassà le sessanta barete, ocore farlo presente a la sposa inpituria de la cassa, che senò ela no ve fa el sconto che ghe speta a i anziani. Anziani, sì, no xe colpa mia se a sta età i ve dise cussita... E sa vardè ben, i vi'o scrive anca sol billieto, come se la fusse na pèca.

Che sia possìbole?

Jani Raise

A casa a go tacà al muro de le vece fotografie de Suisin. Ghe n'è una che me piase pi de staltre, che la mostra la piazza Matteotti col chiosco de l'edicola, dove ca 'ndaséa a torme i jornaliti che jera in voga alora, Tex, Capitan Miki, el Monello e altri. El Suisin de adesso no 'l me pare tanto difa-
rente, anzi! Xe vero, xe stà fata na piazzeta nuova co na fontanela, che no me piase, ghe xe marciapiè da le Mote a la Pisana, xe stà rimesse a nuovo le scuole vece par farghe ufici vari, el prete ga messo aposto cesa e canpanile, ma... Ghe xe case nuove so quartieri nuovi, tuto belo, ma... Suisin no ga on centro che se rispeta, tuto el veciome el xe proprio in centro, na vision orenda par noantri e, figurémosse, par chi che vien da fora. Da senplice suisinan, mi me piasarìa che tute le schifezze che ghe xe in centro le vegnesse sistemà, che anca el decoro vole la so parte. Capisso, ghe sarìa da tirare fora schei, ma vòto che no ghe sia modo de "incentivare" el recupero? Par fare tuto pi brutto ghe xe anca manifesti, locandine, biglietini de chi che ga perso el gato, nùmari de telefono, tuto incolà sui muri, senza retegno. No bastarìa de le bacheche destinà a tute ste comunicazion? Che po' le servirìa anca a insegnare on fià de educazion e de amore par sto paese pien de vita, ma scarso de amor proprio. No credo de èssare l'unico a fare ste considerazion e se le fesse anca, sò mi, el Sindaco o i Vigili, chissà che calcosa no se mova. Volio proprio che le sia robe impossibile da fare?

El sió ritrato chì soto el xe Angelin Cavareta...



Asagne assassine e conziero comunista. Jera scritto!

Da no crédare, i ghe ga lavà el culo!

Na magnada fra amighi finìa co na condana...

L'Estracomunitario

Forse no tuti sa, ma ogni tanto a l'Ostarìa Pessati, deto el bar d'i veciotti, vien fata na zena, senza na rason particolare. El xe on residuo de na vecia tradizione, scumizzià verso la fine d'i ani 60 del sècolo passà. Prima de 'ndare in leto dopo èssare stà da la morosa, se faséa on salto a la base de partenza, so on'ora che, data l'età, la fame jera orba. No mancava el vin, nessun problema co le nàlisi del sangue, on pochi de spaghiti e, par conziero, quello ca catàvino ruspando so le cradenze de tuto el circondario. Desso le nostre fémene le xe diventà tute dotoresse, parlami-seria, e le ne dise cossa magnare e cossa no bévare... Alora, calche stimana fa jera stà deciso de libarare on amigo dal pensiero de tuti i funghi che 'l ghéa sol jazzaroto, cioè i porcini. Paraltro! Poldo ga bu l'incarico de fare le asagne, par via che elo se ne intende, pare, el sò tuto de peso de ovi somà a quello de la farina, diviso par l'acqua e moltiplicà soi mi cossa... L'amigo d'i porcini, par pagare pegno de èssarse libarà da i funghi, el ga fato fare el ragù a la sposa, la Roseta che, par quanto brava che la sia, la xe da Ruigo. Sora el conto ghe xe stà permesso de fare anca el secondo, par paura che el conziero fusse poco. No se sparagnemo pur de contentare i amighi... El menù prevedéa anca salatina, par via del polistirolo, e tanto grana, no parché ghe ne ghemmo de bisogno, ma parché l'asagnaro sostien che "la boca no xe straca se no la sa da vaca". Ma, ghe xe on ma. Tuto pronto, calchedun, che 'l se crede TOTOLOGO, el s'è inventà de cusinare elo le asagne. Xe successo on putiferio, par via de le asagne che le jera massa, e massa cote, o massa fine, par via del conziero che ...ghe jera massa asagne. O forsi par via d'i vuovi, procurà da Cesco che li ga massa picoli. Tante colpe e na condana: par le prossime magnade guai se el Mestro se avizina a i fornèi, tendù da i Jani. A Poldo na seconda possibilità...

A volte la fémene la intriga, ma ghe xe on remèdio...

Fare la spesa e ciapare bòte

...Basta che no se ghe meta in mezo l'amigo!

L'Inviato speciale

Storia del tuto normale. On tale, on dì, el va co la fémene al sèguito e na còpia de amighi so nantra machina, a fare la spesa so na botega de quele grande, che i lo chiama "Centro commerciale". I prezzi xe boni e vale la pena fare na vintena de chilometri, tanto el carelo el se inpenisse. Fato el servizio, on paco grosso toca métarlo davanti, el resto - la machina xe picola - on fià sol bagagliaio e on fià, fémene compresa, sol sedile de drìo. Ghe xe pressa, par via de le sepe congelà, che le ga da rivare casa oncora jazzà par ben. El convòlio el parte e, justo el tempo de fare la strada che serve, el riva a destinazion. El toso, on fià inpedio da la ...sostanza che 'l ga torno a l'osso, el speta senpre che desmonta la fémene e che la ghe vèrza el porton. Ma ela, stavolta, el servizio pare che no la vòja farlo. "Alora - dise elo - vèrzi che se scongela le sepe!" e so quela el se volta par védare che no la gàbia ciapà sòno, soi mi, par via del caldo. On tonfo al cuore a la vista che ghe se vèrze: ela no la ghe xe, no la xe sentà al so posto sol sedile de drìo! El pensiero el xe stà fulminante: "porca misera, la gò assà in parchéjo?". Sì, no ghe xe altre spiegazion... "Ah, ghe sarà de le conseguenze..!", nanpro pensiero fulminante. "Eco parché no la ga protestà có go sbalià strada!". No ghe xe stà el tempo de métare insieme i du pensieri che riva staltra màchina, co amighi e fémene rancurà al parchéjo. A l'omo ghe xe stà dà solo el tempo de far finta de ciaparsela co Poldo che no'l vole, gnanca soto tortura, dire cossa che xe successo dopo. Ai posterì!